



K h ō n g 金 內 褲

「我厝 tshuē 好 --ah，後禮拜 beh 搬，你 kám ē-sái 來 kā 我 tau 搬？」

「好 --ah！後禮拜 tang 時？我來借 1 臺發財 á 來 kā 你 tau 搬。」

論真講 --起 - 來，春美 --á 是 gún 班 --ê siōng suí ê tsa-bóo gín-á 頭 3 名內 --ê，kui 學校算 --起 - 來有頭 5 名內 suí--ê。真 tsuē siáu 豬哥 lóng teh siào 想 beh kap i án-nuá，對入學 kàu tann beh 半年已經風聲講愛 buē tloh--ê 3、40 ê，1 ê 自殺無死 teh tuà 院。3 ê siáu-- 去，1 ê 關 tī siáu 病院，1 ê 關 tī 厝內 m̄ 敢出門，koh 1 ê siáu 藥 á 照 3 頓食，tsiah 敢來學校。5 ê 走去補習班重考，beh 去讀別間，tshun--ê 假做無 tsit 項 t̄i-tsi，看 tloh 春美 --á tō 學蝦 á 倒彈 phùn kah 遠遠遠。我 tsiah-nī 正經 ê 人 tsiah buē 去想 hia 有 --ê 無 --ê，春美 --á 若 ē kap 我相借問我 tō 真歡喜 --ah。

正港 o-tóo-khooh ê 價值 tō 是，hōo lady 拜託，拚死 to ài 做 kah kàu。我 tsiah-nī 勇壯 ê 人，搬厝 tō 像桌頂 teh ni 柑，無隨 kā lady 應好 ná ē-sái！

「Ná ē 雄雄 beh 搬？Teh 學察逐个相看頭看尾 m̄ 是 khah 好勢？」

我真正想 --ê 是，像你 tsiah suí ê tsa-bóo gín-á，tī 外口 kám buē 出 t̄i-tsi。

「厝是 teh tuà 人 --ê，m̄ 是 teh 關人 --ê，人是來讀冊 --ê，m̄ 是做 bái t̄i-tsi hōng liah 來關。出門買 1 下 á 物件 toh-ài phāinn kui kuānn 鎖匙，出入 ài 開 4、5 ê 鎖頭。時間 kàu，ē tshuànn ē 鎖 --ê lóng 關死死，gún tau Kuro ê 狗厝 mā m̄ bat leh 鎖。」

春美 --á 講 kah tsiok 憤慨。I m̄-nā 人 suí，頭殼 mā tsiok 巧，個性好 kah 逐个 lóng 真好鬥陣。Tsiah ē tsiah tsuē siáu 豬哥 1 下 á tō kā tshu-- 落 - 去！Tsiah-nī 好 ê tsa-bóo gín-á，ài 好好 á kap i 做伙，buē-sái 烏白 tshu-- 落 - 去，我一定 ē 認真 kā tau-sann-kāng。

「Kui 間 tsa-bóo 學察關死死 mā 是無效，不時 leh tloh 賊偷，已經幾 nā pái--ah，講 beh liah lóng liah buē tloh，為 tloh 學校 ê 名聲 koh m̄ 敢報警察！有夠惱 --

ê！」

「你有 siánn-mih 物件 hǒng piànn-- 去 - 無？」我問 kah tsiok 緊張 --ê。

春美 --á ê 粉粉幼幼 ê tshuì-phué ná tshih-á tshiâng-tioh 滾水 tauh-tauh-á 紅 -- 起 - 來，紅 kòng-kòng ê tshuì-phué ná tú-á 炊好 ê 麵龜，燒 kah kiông beh tshìng 煙 ê 形，看 tioh i 面紅 -- 起 - 來，ná ē 我 ê tshuì-phué mā lú 來 lú 燒，我 tsiah-nī 正經 ê 人，ná ē 害 1 ê tsa-bóo gín-á ê 面紅 kah tsit 款 --ê，我 kám 有講 tioh buē-sái 講 ê 話？無 --ah！我 kan-na 問 i 有物件 hōo 賊 á-póo khiang-- 去 - 無，kám 講 我有 siánn-mih ē hōo tsa-bóo gín-á phái-sè ê 物件 tī 身軀頂，緊 ànn 落去看褲頭有 kat 好勢無

「Mh.....」我 beh ànn 落去看 ê 時，春美 --á tō 出聲 beh 講，我緊 kā 頭 uat tng 來看 i 紅 kòng-kòng ê 面。無看 tioh 褲頭有 kat 好勢 -- 無，我 ê 心肝 phih-phok-tsháinn。Tsiok 驚 hōo i 知影我 teh 煩惱 siánn。

「1 kuá 衫 á 褲無 -- 去 niâ，khah 要緊 ê 物件 lóng 有 tī--leh，錢 mā lóng 好好，無 pháng-- 去，開 -- 去 -ê khah tsuē。」

「Ka-tsài！若是錢，有 khah 要緊 ê 物件 hǒng khiang-- 去，ē-sái ka 我講。」

I 講 suah 我隨知影 m̄ 是我害 i phái-sè，「ka-tsài」m̄ 是我害 i phái-sè！Teh tī 心肝頭 hit 包紅毛 thōo，雄雄變 tshun 紙 lok-á hiah 輕。

衫 á 褲無 -- 去，其實是褲無 -- 去，長褲？短褲？運動褲？Lóng m̄ 是，是內褲！Tsa-poo 學寮有人開 1 ê 地下站，內底 lóng 是內褲，真 tsuē tsa-poo lóng 知影，我 mā 是聽 in teh 講 tsiah 知影有 tsit 款站，m̄-koh 我 tsiah-nī 正經 ê 人 tsiah buē 去 開 hit ê 站。有 bat 入 -- 去 - 過 ê 人 kā 我講，hit ê 站專門 teh 拍賣內褲。來去菜市 á 買 tō tsiok tsuē--ah，ná toh-ài 開 1 ê 站 teh 網路頂賣？內褲拍賣站賣 --ê 內褲 m̄ 是 新內褲，是學校內 tsa-bóo 學生 á ê 內褲，賣 ê 人 ē kā 穿 -- 過 ê tsa-bóo gín-á kap 內褲 ê 相貼 -- 出 - 來，hōo 想 beh 買 ê 人 huah 價。價 siàu siōng kuân ê 人買 -- 去。Tsa-bóo gín-á lú suí--ê，價 siàu ē hǒng huah lú kuân。春美 --á tī 學校內 ê 人氣 hiah tshìng--tioh，聽講 1 領 bat hǒng huah kah 幾 nā 千。

「免 --lah，若真正錢 pháng-- 去 tsiah 叫厝 --ê 寄 -- 來 tō 好 --ah，你 beh kā 我 tàu 搬厝我 tō tsiok 歡喜 --ah。」

聽 tloh 春美 --á 講 i 歡喜，我 mā tsiok 歡喜！

Beh 搬進前 1 暗，春美 --á tō kā 物件款好勢，疊 tī 房間門邊 --á。隔轉工我 kā 發財 á tshah tī tsa-bóo 學寮頭前，學寮內 --ê lóng tsiok 好玄走出來看，對 hia 過 ê tsa-poo 學生 kā 我金金相。Ná 像幾 nā 百 tsuā Laser tsuānn-- 入 - 來，我身軀 hōo hia 豬哥怨妒 ê Laser tsuānn kah kui 身軀燒燙燙，kiông beh 爆炸！

(其實是 hit kang 日頭 tsiok 炎，曝 kah kui 臺車燒燙燙，buē 曉開冷氣 --ooh ? Kán ! 借 tloh 1 臺銅管 á 車，kan-tann ian-jín，thài-ià，han-tóo-luh，pah 速 gí-á 好 --ê，tshun--ê lóng pháí 了了，bak-khú-mí-á tshun 1 pîng，駛 ē 行 tiō 好偷笑 --ah。)

春美 --á tshuā 我入去 tsa-bóo 學寮，kha beh hānn-- 入 - 去 ê 時，頭殼內 kan-na 想講，tsit 步 hānn-- 過 - 去，tsit 世人 tō 行入去無 kâng 坎站，kan-na 我 ē-sái 入 -- 去，別人 lóng 無法度，khí-moo 真正有夠爽！M̄-koh 驚 hōng 當做無正經 ê 人，我頭 m̄ 敢烏白 uat，目睷 mā 乖乖看頭前，m̄ 敢烏白相。無 kah 半點鐘 tō kā 物件 lóng 搬去發財 á 後斗。帆布 khàm 好勢，tuè 春美 --á oo-tóo-bái 後壁，載去 i 稅 tī 市內 ê 厝。

對大路 uat 入去 1 條巷 á，正手 pîng 1 排販厝，lóng 起 3 樓 kuân，第 5 間亭 á-kha khiā 1 ê oo-bá-sáng，春美 --á 騎過去 kap i ai-sá-tsuah，我 kā 發財 á tshah tī 路邊，落車 tháu 帆布。Tháu 好 mā 是半點鐘 tō 搬好 --ah。Hit 暗春美 --á 請我 1 頓好料 --ê。

春美 --á 稅 tī 3 樓，1、2 樓厝主 ka-kī tuà，3 樓有 3 間房間，便所、洗身軀間公家用，搬 ê 時有小相 1 下 á 房間內底，眠床、冊桌 á、電視、冷氣 lóng 有，有 1 組 thàng-suh tsiok 大 kha，m̄ 是外口買便 --ê 做好 --ê hit 款，是厝內 teh 裝潢 ê 時做伙做 --ê，tsit 款 thàng-suh khah 大 kha，ē-sái 裝真 tsuē 衫 á 褲，棉被，有 ê ē 做暗 thuah 藏 1 kuá 有 --ê 無 --ê。M̄-koh 釘死 --ê，buē-sái 徙位，buē-sái 換，kan-na ē-sái 拆掉重做。

知影 hit ê 內褲站了，我不時 ē 走去 bóng 看，我 tsiah 正經 ê 人 tsiah buē tī hia 買 móo-mí 人 ê 內褲，á 無是 teh 看火大 --ê ?

M̄ 是！！內褲 kap 衫 á 褲 kāng 款 lóng 是用布車好 thīnn 好 hōo 人穿 --ê。用 ê 料好 bái，車工幼 ah 粗，style suí-bái，有 ê 貴有 ê 俗，價 siàu mā 是對內褲本身來 --ê。Koh-khah 按怎講 mā 是「內褲」ê 價 siàu！無 kāng 人 ê 內褲 tī 內褲站標 ê

價 siàu 無 kâng，春美 --á ê 內褲 huah kah kài 貴，oo-bá-sáng 校長 ê 內褲 khah 俗 to 無人 beh 愛，用料，車工，sayle lóng 無差。M̄ 是「內褲」ê 價 siàu，是「siánn-mih 人 ê 內褲」ê 價 siàu 無 kâng，tse 實在 tsiok 趣味！

我用記 siàu ê 軟體 kā 「móo-mí 人 ê 內褲」ê 價 siàu 記 -- 起 - 來，kā 價 siàu 畫 tī 1 ê 架 á 圖內底，直 --ê 記價 siàu，橫 --ê 記時間，kiann 日 1000 tō tī 1000 點 1 點，mī-á-tsài 1050 tō tī 隔轉工 hit tsuā 點 1 點，照順序 kā 逐工 ê 價 siàu 點 -- 起，kui 個月落來 tō ē-sái 知影「móo-mí 人 ê 內褲」ê 價 siàu 是按恁走，春美 --á beh 搬出去 tuà 進前，價 siàu tō 開始起，tsa-bóo 校長 --ê lóng tī 1 khooh 5 角 hia 走，m̄-bat 振動 -- 過。便若 tsa-bóo 學察 tloh 賊偷，價 siàu tō ē ná 電線漏電 tiō 1 下。

春美 --á 厝搬好隔轉工，tsa-bóo 學察 koh tloh 賊偷，學校 mā 是 liah 無賊 á-póo，hit 禮拜 kui 陣 tsa-bóo 學生相招去補貨，市內 ê 衫 á 店 hōo in tsinn kah 滿 -- 出 - 來。

內褲站 ê 價 siàu tiō kah phih-phok-tsháinn，賊 á-póo 放真 tsuē 新內褲出 -- 來，差不多逐个 tsa-bóo gín-á ê 內褲 lóng 落價，tsa-bóo 校長 ê 內褲價 siàu kāng 款 buē 振 buē 動，kan-na 春美 --á ê 內褲對 hit 工開始起，1 工起 beh 100 khooh！連 suà 起 kui 個月，價 siàu 起 kah ē-sái tī 衫 á 店買 kui 擔！若是有 1 項物件逐个 lóng 想 beh tih，出 buē 赴 hōo 人買，ah 是斷貨，hit ê 物件價 siàu ē siáu 起！起 kah 超過 hit 項物件本來 ê 價值。春美 --á ê 內褲 tsiah tsuē 人 beh tih？？？我 tsiah-nī 正經 ê 人，tsiah buē 想 beh tih，若是 koh ū siánn-mih tã-tsi ē-sái kā i tào-sann-kāng，我 tō 真歡喜 --ah！

春美 --á 搬去市內 2 個半月，賊 á-póo mā 是 tiānn-tiānn sō 入去 tsa-bóo 學察 piànn 內褲。

Kan-na 春美 --á ê piànn 無，「春美 --á ê 內褲」一直起價，有 ê 人 kā 進前買 --ê theh 出來拍賣，貼好 enter tshih-- 落 - 去隨 hōng 標 -- 去！1 領已經 huah kah 8000 ah！學校 siōng suí 前十 --ê ê 內褲 lóng 無超過 3000 khooh。春美 --á tsit-má 已經是 kui 學校 siōng suí ê tsa-bóo gín-á ...

M̄-tloh，是 siōng 貴 ê 內褲，隔壁班 ê 班長 mā 是比 i khah suí！

Beh 歇暎進前 2 禮拜，我 tú 對學校餐廳食飯飽 beh 出 -- 來，春美 --á tī 餐廳門口 kā 我 tsah--leh，目頭結 kui 球，tsiok 鬱卒 ê 形。I 講稅厝 hia ê 厝主講 in tau ê 金 á 無 -- 去，想講是 tuà 3 樓 ê 人 kā in 偷 theh，叫我 kā i tàu-sann-kāng。

Hit 陣若是有鏡 thang 照，我 ê 面一定 tsiok ngāi-gioh--ê，春美 --á 來 tshuē 我 tàu-sann-kāng 是我 siōng 歡喜 ê tāi-tsi，m̄-koh i hiah-nī 鬱卒 khiā tī 我頭前，我 buē-sái hōo 人看 ē 出 -- 來我 teh 歡喜，mā 是 ài 激 1 khooh 真艱苦 ê 屎面 hōo 人看，激 kah 我 ê tshui-phué 肉 kiông beh kiù 筋。

「金 á 無 -- 去 ???」

「Beh 按怎，i 講一定是 gún kā theh--ê。」

「Khng tī tó 位 ê 金 á 無 -- 去？」

「厝主講 khng tī 我稅 ê hit 間房間 ê thàng-suh 內底。」

「你搬入去 tuà beh 3 個月 --ah，kám bat tī thàng-suh 內底看 tloh 金 á？」

「無 --ah！你 buē 記 eh 你 kā 我 tàu 搬物件入 -- 去 ê 時，我驚 thàng-suh 內底生菇，kā thàng-suh 開開用電風吹，hit 陣內底 siánn-mih to 無。」

「Mh...。我 ē 記 --eh！」

「我 mā án-ne kā 厝主講，i tsiah 講是藏 eh thàng-suh ê 暗 thuah 內底。」

「暗 thuah ??? 你 kám 知影有暗 thuah？」

「我 m̄ 知 --lah！厝主講 beh 報警察！Beh 按怎？」春美 --á tsiok 煩惱 ê 面。

我聽 tloh 講 beh 報警察 tō 笑 -- 出 - 來！

「你是 teh 笑按怎。金 á 無 -- 去我 beh 按怎賠 ???」春美 --á 用哭調 á ê 聲講。

「免驚！叫警察來！我！M̄ 是！警察 ē hōo 你靠！」

「你 mài 亂 lah ! , 你 beh 害我 hǒng liah 去關 --ooh ?? 」

春美 --á 頭殼 kài 巧, m̄-koh mā 是 hōo 學校烏白 kā 教 kah khong-khong。Tsit 款 tsiah 簡單 ê 道理 to m̄ 知, hit 工我 kap i 去 i 稅厝 hia, 厝主警察已經叫好 --ah, kàu 位看 tloh 厝主 kap 管區 --ê teh 廳 --ê lim 茶, 厝主一直投, 講金 á lóng 總 3、40 兩, 想講 tsit-má 金 á 起價 beh theh 出來賣, suah lóng 無 -- 去。管區 ná lim 茶 ná kā àn-nāi。

Kàu 位厝主知影我, 我先 kā 管區交代我 tī 學校 kap 春美 --á kāng 班, 是我 kā tàu 搬 -- 入 - 來 -ê, mā 有講搬 -- 入 - 來 ê 時 thàng-suh 內底 siánn-mih to 無。

「金 á 是 khng tī thàng-suh 內底無 -- 去 -ê ? M̄-koh in 搬 -- 入 - 去 ê 時 lóng 無看 --tioh。」管區 --ê 問厝主。

「Hia 金 á 是 tshuân beh hōo gún tsa-bóo 囡送定 --ê, lóng 無 -- 去 -ah 是 beh 按怎。」厝主講 kah ná 歌 á 戲 ê 老旦。

「你 m̄ 是講 tsit-má 價 siàu 好 beh theh 出來賣? 」

「Tloh--ah, 想 beh 賣 --1-kuá, tshun--ê 留 leh hōo gún tsa-bóo 囡送定。」

「金 á khng tī thàng-suh ê tó 位? 」管區 --ê 問 kah kài siān。

「我驚 ē tloh 賊偷, kā 藏 tī thàng-suh 內 ê 暗 thuah」

「暗 thuah? 」

「Tloh--ah! 5 年前 bat tloh 過賊偷, 現金、鍊 á、手指、耳鉤, 金 á--ê lóng hǒng piànn 了了, kan-na tshàng tī 暗 thuah ê 金角好好無 pháng-- 去, 尾 --á tō lóng tshàng tī 暗 thuah 內底。」

厝主講 kah tsiok iānn--ê, 看 -- 起 - 來 tō 是我 siōng gâu tshàng ê 面。

「你稅厝 ê 時有 kā 暗 thuah 內底有金 á 寫 tī 稅厝 ê 契約內底 -- 無? 」

「無 --ah, ná 有人 ē kā 藏金 á 寫 hǒng 知!! 」厝主講 kah khiā-- 起 - 來。

「Án-ne 我知影 --ah。Án-ne tsit 條案 kap 你 ê 厝 kha 無 tī-tāi。」

「Ka-tsài！」春美 --á kap 我做伙講 -- 出 - 來。

「你 beh 食案??」厝主 kui 个人火 toh-- 起 - 來！

「我 ná 有 beh 食案!!」管區 --ê mā 火 toh-- 起 - 來。

「稅厝契約內底有寫 --tioh ê 物件 pháí-- 去、無 -- 去，tsiah ē-sái tshuē 厝 kha 討。無寫 --tioh ê 物件 pháí-- 去、無 -- 去，lóng kap 厝 kha 無 tī-tāi。金 á 藏 tī 暗 thuah kā 厝稅 -- 人，全世界 kan-na 你 1 ê tsiah gâu ê 厝主！」

「Án-ne tō 是金 á 無 -- 去無春美 --á kap 厝 kha e tāi-tsi？」我緊 kā 管區 --ê 問。

「Tioh--ah。M-koh 你 ē-sái 報 tioh 賊偷。He tō 是別條案。厝 kha 若無 theh，lóng 無 tāi-tsi。」

「Ooh…… Beh kā 我驚 -- 死 -ooh！」春美 --á kui 个人軟 -- 去 ê 形。

「你 tsiah koh 來派出所報案講 lín tau tioh 賊偷。Buē-sái koh kap 厝 kha 花！」

尾 --á 厝主去報案，查 kui 個月 mā 是 liah 無賊 á-póo。管區 --ê 講暗 thuah 內底 kan-na lâ-giâ 牽絲，m-bat 有藏過物件。

我 tsiah-nī 正經 ê 人，tsiah buē 想 beh 去買 móo-mí tsa-bóo gín-á ê 內褲，ē-sái kā 春美 --á tàu-sann-kāng 我 tō tsiok 歡喜 --ah！春美 --á ê 內褲 tī 內褲拍賣站 hōng huah kàu 9999 ê 時，我 tō 想講一定 beh 來 piànn 2 擔「春美 --á ê 內褲」，hōo hia siàu 想 beh tih ê siáu 豬哥「開 1 條大條 --ê！Tsiah kā hia ê 錢寄附 hōo 學校做獎學金，春美 --á hiah suí koh hiah 巧一定領 ē tioh。」

我 teh tshiau thàng-suh ê 時，有看 tioh 暗 thuah！



作者感言

董耀鴻 打石工

內褲 tiòh 金牌！啥物人 ê 內褲 tsiah gâu ?
有 thang 比贏眾人 thèh 金牌！
歹勢 --lah！是我 ê--lah！
M̄-koh 我 lóng 買 3 領 99 ê 棉 á 內褲！
無 khōng 金 á，無 tàu 璇石，ná ē tiòh 金牌？
Kám 講是我生做 siunn 古錐？
A'h 是穿 -- 過 lóng ē 芳芳？
Ài 緊來去 tshuē 金 á 店，
phah 1 塊金牌結 tī 褲頭，
人 tsiah ē 知影 tsit 領內褲
正港有金牌 ê pān！

後 pái tshuē 1 領內衫來比看 māi 好 --ah！